

四庫全書

集部

欽定四庫全書

集部

潛山集卷一至三

詳校官庶吉士_臣李傳熊

主事_臣呂雲棟覆勘

謄錄監生_臣陳 祁

謄錄監生_臣沈 霽

欽定四庫全書

集部四

提要

潛山集十二卷

別集類三

宋

臣等謹案潛山集十二卷宋釋文珩撰文珩於潛人其生平遊歷畧見於所作舊遊一百十韻詩中大抵出家於杭州遊于湖州因而遊浙東至閩由金華嚴陵迤越北又至毘陵陽羨金陵淮南而止後仍歸杭州遘讒下獄

久之得免遂遁跡不出以終集中有又看景
定新頒朔百歲還驚五十過句知其生於宋
寧宗嘉定三年辛未宋亡時年六十六又杭
州薦福寺記題至元乙酉二月遣興詩稱七
十七歲潛山翁則至元丁亥尚存其行事則
不少槩見惟咸淳臨安志載咸淳三年九月
二十四日賈似道至小麥嶺旌德顯慶寺游
山題名中列衲子四人文珣與焉疑亦托跡

朱門者然集中過似道葛嶺舊居詩極詞詆
斥若有餘憤而紀事一詩作於似道初貶時
其序言似道位亢志驕陰謀篡逆言洩于夏
金吾金吾欲誅之懼而宵遁云云雖與宋史
所載夏貴請死守淮南似道奔還揚州之事
不甚相符而抉摘隱惡至加以曹瞞代漢之
罪非似道之黨可知且集中獨吟之作十之
九倡和之作不及十之一所與倡和者又不

過褚師秀周密周璞仇遠數人皆一時高人
文士亦足徵非干謁之流或似道重其名衲
游山邂逅偶挈同遊遂題名賓從之末亦未
可定也其詩多山林間適之作比興未深而
即事諷喻義存勸戒持論率能中理觀其裒
集詩稿一篇有云吾學本經論由之契無為
書生習未忘有時或吟詩興到即有言長短
信所施盡忘工與拙往往不修詞惟覺意頗

真亦復無邪思其宗旨品格可以具見矣厲
鶚宋詩紀事所錄釋子凡二百四十人顧嗣立
元百家詩選所錄釋子集凡十五家皆無其
禪藻一集蒐羅頗富亦不登其一字則是集
之佚其來已久今從永樂大典哀輯得詩尚
近九百首宋元以前僧詩之工且富者莫或
過之乾隆四十六年九月恭校上

總纂官_臣紀昀_臣陸錫熊_臣孫士毅

總校官臣陸費墀

欽定四庫全書

潛山集卷一

宋 釋文珞 撰

四言古

堯任舜禹行

堯任舜禹聖化日熙二臣至德惟堯克知明良胥會徵庸弗疑佐命垂統股肱綱維行堯之道蚤夜孳孳上齊七政大錄萬幾與人為善念茲在茲舉相去凶咨牧授時執德於心其化若馳洪水滔天浩浩無涯下民昏墊

荒度為宜乃乘四載奠決刊隨櫛風沐雨手胼足胝四海會同九澤具陂誕敷文德帝命是祗翔泳咸若鳳皇來儀堯嘉厥功翕受敷施同聲相應百僚師師是知官人安危之基用賢則安用佞則危惟彼陶唐百工允釐後世有述先天弗違能賞能禪繼承伏犧為民之極黃收純衣明並日月照臨無私不言而治端拱無為民無能名蕩蕩巍巍惟天為大惟堯則之先聖斯言當深致思或未之思室是遠而

天地無窮行

天地無窮人處于中三才既兆庶類皆通至聖立極萬
方所宗如星拱北如水朝東垂衣而治天下為公孝慈
道廣是謂大同自茲而降謀用是崇兵由此起彊弱相
攻上下分亂莫知適從匪茲禮義曷能靖共順之者吉
逆之者凶不能率此斯曰顓蒙窮通得喪實維降衷巧
愚不與係於遭逢毋肆小智以菑厥功安時處順於焉
考終

天道夷簡行

天道夷簡蕩蕩巍巍人心不然大行險熾轉眼翻覆誠不易知忠或見疎信或見疑離間致入寧復顧思昔者繾綣終焉棄遺聖如周公王猶不知孝若申生姬能死之在彼盛時尚有爾為况乎季世顛倒是非讒人飽祿志士苦飢俯仰今古其誰不悲命懸于天逆之為嗤冲靜無患進取必危守道安危其殆庶幾禍福之兆可以理推夷齊去周西山採薇黃綺避秦商巖茹芝景行先

哲良足為規規而罔念雖悔何追

天道雖遠行

天道雖遠人心匪殊內直不欺與天為徒對越無愧陟
降恒俱祝史陳言曾非矯誣桑林之禱金縢之書至誠
感通如鼓應桴神人以和大信以孚不勉不思自止于
符天有常道人無異塗志斯一矣天其遠諸大道既漓
人心日渝背天從欲覆族亡軀作善降祥為惡速辜聖
言孔彰是訓是謨一念之差千里而迂惟當自修以反

厥初

別日何易行

別日何易會日何難道路修阻山川鬱盤寤寐懷思涕
泣沈瀾思君不已損我容顏時歌舊章期以自寬歌終
太息反開憂端孤鴻嘹唳過彼雲間欲托遺音遐征不
還出戶徘徊風露淒寒明月皎皎星斗闌干羅帷飄揚
顧影難安耿耿長夜摧此心肝

北遊朔城行

北遊朔城險阻艱難荒溪遐曠穹谷紆盤白日晦景陰
雲洞寒凝冰不治積雪寧乾凍草色死北風聲酸林嘯
猛虎路多胡豸愁腸分裂趼足蹢躅風餐不飽露宿難
安別離之苦維昔所歎懷哉征人曷云來還

山中放歌

并序

翁年七十有五息影空閒寂寞之濱期與世絕因作
歌以見不復出山之意其辭曰

春草離離秋蘭猗猗足紉吾衣南山有芝西山有薇足

樂吾飢誰信誰疑誰是誰非足亡吾機或瘞或焚或暴
或沉足為吾歸生浮死休已而已而出山何為歌闌聲
消隱几而息夢為飛雲遨遊八極我為雲邪無待無得
窅然皆喪自適夫道吾心之適富兮貴兮吾不與易

五言古

靈鳥篇

嘗聞有靈鳥其名為鳳凰九苞信嘉瑞五色成文章其
宿必丹穴其鳴在朝陽有德斯出現德衰還伏藏始至

於少皞再稟於陶唐舜恩被動植聞韶復翱翔聞其出
非時見歌於楚狂仲尼歎不至是亦為世傷蕩蕩二千
齡孰能致斯祥當今邁三五君明臣且良其或一來儀
足以慰萬方鳳兮儻不來吾淚徒滂滂

羌笛

美竹生窮崖西人翦為笛制度誠簡易不假金玉飾五
音既繁會八音亦交出鳳鳴何雖雖龍吟尤歷歷貪者
聽之廉愁者聽之懌懌者聽之和勞者聽之佚遺調感

人多今人孰能識空復想桓伊三弄楚天碧

悠悠萬里行

悠悠萬里行河畔草青青草有衰歇遠行無期程秦
既滅六國驅民築長城長城三千里將以限北兵城邊
沙水寒飲馬馬悲鳴築夫困久役誰無鄉土情父母念
孝養室家歎孤嫠萬一死於築白骨空支撐膏血脂草
莽魂魄亦飄零苦哉築城人舉杵無樂聲仁守國自固
不仁禍斯宏祖龍不知此縱暴勞蒼生高明鬼瞰室天

道常惡盈長城徒高高不救秦祚傾豈若唐虞君垂衣
燕泰寧至德亘萬古巍巍不可名

征婦怨

寧為路傍草莫作戰士妻初嫁席未溫夫今戍遼西憶
與夫別時山川正飛雪腰間弓箭重冰凍馬蹄裂夫君
在萬里如何可相求瞻彼日月光使妾心悠悠悠悠復
悠悠相思曷云已夜夜勞夢魂遥遥渡遼水軍中有紀
律君當慎終始勿以念室家無心事戎壘自昔忠義人

從軍皆效死

杜宇朝夕啼客舍檐樹間

杜宇蜀帝魂啼時吻流血知有思歸人日夜啼不絕吾
歸渺無期汝啼豈易說故宮春草深高堂滿簷雪

讀史有感

明良但間作瑣瑣常相因讒諛既得志聖哲多罹屯大
化造萬物差品難具陳薰蕕不同器仁暴當異倫使之
混而處衲鑿安能親西伯居美里仲尼傷獲麟遂使黃

綺徒商山終避秦
漱泉茹紫芝揮手謝世人

戒奢

義農至舜禹所尚惟樸素
迨及三代衰君臣皆不度其
源既已開展轉若塗附秦漢
距陳隋相沿少知悟傷財
而害民多不能永祚乃知縱
奢淫天人所同惡金玉不可
衣錦綉不可茹所貴在農桑
工巧皆民蠹

秋胡詩

潔婦與秋胡以禮成配匹
畢結方五朝秋胡事行役道

蓬既云遠年運亦易徂日月迭相代五回見榮枯秋胡
仕侯邦音塵久踈絕誓言奉姑嫜秋霜擬貞潔春日行
採桑援柯向前林秋胡倏來歸相逢贈黃金重義不受
金采采實筐篚歸來見夫婿乃是贈金子苦辭讓其誓
投身入淵死豈是不愛身示心如此水

浮萍寄水行

浮萍寄諸水漂流本無根倚水以為命然後生意蕃女
子方在室怙恃父母恩及其既結髮託身向他門室家

以禮合偕老古所敦畢力閨中事未嘗憚其煩夙興而
夜寐黽勉無後言德音罔違越生育皆充完夫壻輕薄
兒翻覆何無端青天起雲雷無風作濤瀾中情一朝異
棄舊淫新婚宴爾如兄弟視我同讎怨非唯不見答暴
怒難具論妃耦道遂喪安能久自存祇憐妾薄命仰天
每長歎願還念昔者無為卒相謾

靜夜不寐行

靜夜不遑寐秋氣殊清清霜露塗庭蕪隕葉摧枝莖西

風更蕭騷萬竅皆同聲蜻蛚亦含悲嘖嘖牀下鳴出門
一以視青天綴繁星三五正縱橫北斗方斜傾飛鴻朔
方來迢迢因遐征中路失儔侶隻影何煢煢感物懷遠
人徘徊以屏營心折不能言默默徒憤盈

贈道士褚雪巖

褚君樂嘉遯門徑多青蕪心同水月皎身與山雲俱古
壁懸篆籀不愛燒藥鑪南華註已畢終然得玄珠高風
度寥廓逸韻凌江湖策杖時過我我機事無中情了

無取斯為真隱徒知己換凡骨何時上清都

賡趙別駕天寧古檜韻

檜龍奮頭角百獸毋敢穽居然護祇園老魑鬼驚本
根既深固樛枝任縱橫秋城風雨癡或躍常夜鳴夜鳴
不自已江頭雲霧生乘雲何所之變化朝帝京歸來氣
尚豪撼動老禪兄空庭儼相對健骨殊淒清中林萬古
松或可為同盟蒲柳先秋凋襟期信難并異質誠正直
扶持乃神明更有霜雪繁黛色挺孤擎

江頭雨霽

雨收江路涼徐行吊孤影遠岫夕陽明平洲霽華靜渡
頭人盡歸佳趣在漁艇漁翁不自知醉臥風吹醒

鏡中放歌

日日行鏡中身與白鷗同閒蹤無滯留清興何始終紅
蕖耀晨妝綠蒲媚新叢長歌對漁父滄浪有遺風

野外即事

春暮倉庚鳴農家語堪聽雨暘不違時麥高桑葉青烹

豚酌清酒廟中謝神靈
田蠶杯琰好歡聲動林垌
祭罷各分散羣鳥啄餘腥

結交

結交盡閒交日欲共幽討
道人失前期使我縈懷抱
清猿往相催同來須及早
良恐秋風高吹我杞菊老

遠別曲

問君何所之執手立前墀
可堪為遠別都不道回期
簷間蟪蛄蟲似知妾心悲
纏綿結離恨千絲仍萬絲

投宿山家

山家忘四時力作倦還息鴉鳴知欲曙雞栖念當夕兩
男皆長成盡解供賦役季女方及笄亦復能紡績老翁
獨無事醉飽岸巾幘喜客到柴扉掃室具枕席棗栗非
外求園蔬更堪摘殷勤活生理頗覺計自得我生獨何
為轉徙常寄食語殘燈欲死草際蟲嘖嘖

廢塚

荒草沒頽垣知是何人墓高頂上牛羊空間住狐兔行

旅為傷神子孫在何處颼颼起悲風蕭騷白楊樹

鄞江送友

西風日夜起江上楓葉亦可憐未歸人復送行遠客相
見鬢毛改轉覺世路迫他日慰相思豈必在書尺薄俗
能移人出處當自力

喜晴

郊行雨初歇野徑泥猶滑斜日照殘雲雲邊飛鳥沒別
浦有行舟乘流櫂歌發對景未能去沙頭待新月

經旬雨不斷今日喜新霽杖策東臯行桑柘陰翳翳蠶
老欲登箔菜麥亦可刈田園足生理外此盡誤計父老
誠見客吾駕從茲稅

客夜

客館何寥寥明月竟牕戶青天懸列星零露霑宿莽懷
感不遑寐起坐聽漏鼓聽罷復重聽聽徹三四五

觀海

粵自兩儀分溟波長諸水涵渟昭體量沆瀣無涯涘一

目但沖融百川競輸委東閨號扶桑西或稱濛汜浴日
揚明輝浮天忘表裏神靈奠厥居鱗介安攸止蜃氣成
樓臺珠光耀坻沚漁商所依憑利用何窮已鼓楫通九
夷乘風超萬里初唯見平相漸得悟深理儻可覓蓬萊
當從赤松子

永嘉迪古巖作亭楫竹間東閣為摘少陵天寒
翠袖薄日暮倚修竹句扁曰寒倚書來索詩寄

題四韻

金定四庫全書
卷一
凜凜冰玉質亭亭雪霜姿共此歲寒操不與東風期羣
芳性苦殊道人心自知悠然澹相對千載有遐思

蠶麥辭

山人日無事行行自娛嬉竹西數家村喜聞翁媪辭蠶
以禦我寒麥以充我飢二者嘗致禱羣神將我貽繭必
大如瓊繭繭皆成絲麥必生兩岐粒粒皆可炊儻得遂
所願報謝無敢遲此意頗淳古當見於周詩

夢覺辭

霜月何皎皎寒風更淒淒氣候感微蟲終夜常悲啼遊
子當此時能不念故棲念久結為夢遠過橫塘西此夢
亦良勞屢涉山谷溪宛然見親友笑語相招攜覺來仍
在旅鄉遠人乖睽浮生等如夢短長不須稽

晚宿山寺

日晚投山寺蕭然異人境石房雲氣深苔階雨聲冷心
清不成寐篝燈對孤影清猿亦可人長嘯西南頂

題東臯

東臯縱遐目生意良自多
魚躍喜冰釋鳥語乘春和
芳蘭馥餘芳名花眩喬柯
倦客獨無依奈此庶物何

披雲亭

我愛山中人冥心住幽寂
危亭上絕巘不染世人羣
峯合空翠疑若天宇窄
午夜獨長嘯雲開山月白

題聽松亭

別駕公事閒翦棘開三徑
天風引長松蕭蕭滿清聽
坐石琴意真憑欄醉魂醒
亦使山中人悠然動歸興

題靈泉寺更幽軒

寒泉發靈竇翠靄生重岡偶因山鳥鳴得此林僧房高
槐肅夜氣短牖熙晨光空門了無事歲月靜中忘

為清渭濱賦集清軒詩

造化既索篇塊圯斯無窮下達于幽陰上徹于穹窿物
各限已私是以無全功高人作軒宇與彼造化通洋水
皆心深一碧涵虛空洗盡世間塵萬象皆冲融乾坤清
淑氣大集於其中為語登軒人快靚開昏蒙

郊外春日

垂楊裊東風桐花醉鳴鳩地僻無行人方塘水交流

春夜夢遊溪上如世傳桃源與梵僧仙子遇

具蟠桃丹液靈芝胡麻於雲窻霧閣間請賦
古詩頗有思致覺而恍然猶能記憶五句云

灘峻舟行遲亂峯青虬蟠一瀑素霓吼靈桃
粲丹朱僊飯雜芝糗遂追述夢事足成一十

七韻

隨意作清遊唯與筇竹偶徘徊望原田宛轉赴林藪隔
溪更幽竒欲往興彌厚漁人自知心涉我不待叩爛爛
桃花明粼粼白沙走灘峻舟行遲輟棹入崖口亂峯青
虬蟠一瀑素霓吼微徑上青冥高木掛星斗梵宇金碧
開萬象發蒙鄙老僧雪眉長妙語滌心垢乘雲者何人
笙鶴自先後邀余過殊庭酌以流霞酒靈桃粲丹朱僊
飯雜芝糗白鹿守天壇彩煙生藥臼謂言保其真物我
盡芻狗窻外鐵鐘鳴驚覺復何有乃知百年間夢境匪

長久

夢中作

棄置何足憂貧賤元非病山邊水邊行頗適幽人情柴
門絕輪鞅蒼苔滿修徑忽聽漁者歌還動江湖興

記夢

神清發幽夢夢到仙人峯老仙啓玄門問我來何從仙
髮映山綠仙顏眩日紅高低種玉田異植方茸茸里閭
見翁媪亦復非塵容雞犬聲相聞略與桃源同雲中飛

僊人縹緲如游龍
過征不可即得非
是喬松白雲既變
滅仙輶亦無蹤
夢覺兩何有聞打
西林鐘

過嚴灘登子陵釣臺

幽人山水心獨向
新安去應為一絲
風元非釣名具浪
高灘七里片石還
如故回首問雲臺
荒煙渺無處

旅感

苦無住山資千里
遠為客兄弟會面
難雙親鬢毛白故
園書不來愁緒日
夜積滿庭枯草根
忽復化新碧

大水後作

田家望西成，彌月雨霖霖。
靈流潦迷川，澤杭稻盡漂。
淤牛犬犇崇丘，雞亦栖高樹。
室廬畢沈沒，野老無歸處。
大家還急租，官中未蠲賦。
妻子多轉徙，天高不可籲。
但願吾皇知聖恩，加咻噢。
下詔發倉廩，賑卹散紅腐。
不唯赤子活，亦使根本固。
八表皆歸仁，萬歲永終譽。

秋懷

霜風吹槁梧，索索生秋聲。
梁燕已無跡，哀鴻復南征。
遊

子當此時轉覺難為情
庭闈隔千里日夜白髮生

倣古思邊

去年與君別綠樹聞啼鴉
今年當此時憶君君未歸
音書難寄遠珠淚濕羅衣

秋光

秋光已過半風氣日淒緊
鴻鴈復來賓燕鶯無留影
遊子於此時感物念鄉井
縱使夢能歸歸塗難歷省

送歸篇

秋老木葉乾露冷蟲聲死
征人未授衣鄉心日千里
揮手睇雲帆頃刻限煙水
他時慰相思遠寄書一紙

欽定四庫全書

潛山集卷二

宋 釋文珣 撰

五言古

還山

吾性本閒曠素不喜城郭而况賓主間禮數相束縛
悵望西南山佳氣日參錯逸興不可羈飄飄出籠鶴翩然
曳杖還專意在一壑時方孟夏初衆花已零落櫛林晚
雪香麥隴殘雲薄谷深絕遊塵苗田叫姑惡幽人舊相

知一見心喜躍謂言舊山畲今猶可耕鑿日夕共登臨
靡憚筋力弱於焉得天真畢志甘澹泊初非傲軒冕終
又畏矰繳置身聲利場何如且行樂纍纍北原上萬古
同寂寞

僊佛辭

僊以靜為道佛以空為宗羣動本皆靜萬有體恒空服
食迷靜趣僊道不可從宴息昧空性佛理無由通或曰
空靜殊斯言吾不庸空靜即僊佛得於此心中心乃佛

僊質僊佛心之容三法妙而一脗焉歸大同

深居

深居謝交遊積業任埋徑澹然忘所營為是疎懶性已
達身本虛寧憂室垂罄時於泉石間信意成短詠予以
寫吾情漁樵或相命一皆用其真魯魚事參訂猶不拘
四聲豈復疑八病難入時人耳獨許山鬼聽生來妄想
絕禪心本清淨斷不重出山此志寔先定

戊婦詞

女蘿施松栢終始相因依結髮為婚姻偕老相與期夫
今戍邊城賤妾無由隨行行日已遠何時定當歸但願
崇勲業上報明主知諒君守恒節妾心終不移

短歌行

憶昨遊中林鳥鳴蘭蕙芳重來豈云久草木倏已黃乙
鳥始辭去羣鴻復南翔天道有代謝人生安得常促促
不我留譬如石火光紅顏日以瘁玄髮日以霜載念泉
下人寧不增悲傷聆我短歌行歌短意則長

竹下曉吟

竹下坐清曉，露氣沾裳衣。
樓鐘發清響，山月耿餘輝。
心靜息欲無，渺與萬物違。
莊周苦未達，夢作蝴蝶飛。

先雲洲訪予於萬玉歸而寄詩因用其韻

曉行竺山心，草露濡衣襟。
稽留雖在眼，謝客難重尋。
靈木逾千齡，斤斧日見侵。
侵伐殊未已，使我老氣瘖。
雅樂寢不作，滿耳侏離淫。
野性羞雷同，自為梁父吟。
疵賤苦無力，安能變夷音。
畏塗不可行，林下甘陸沈。
世道已如

此懷抱那易禁獨愛古桂林歲晚猶森森此桂亦未保
慨歎良又深

靈雨

靈雨應時至四野生新泉胥井久廢汲湛湛成深淵老
農喜欲舞田苗綠如煙桔槔掛屋梁坦腹清晝眠

雨後

夜雨萬雷集漲水三尺深游鱗得其所波間自浮沉科
斗千點墨鯉鯽數寸金偶會濠梁意道人本無心

古意

難與時流道憂心常悄悄古道貴平易今人尚機巧好
古而居今每飯不能飽來往無嫌猜唯知愛沙鳥

逝水尚東流白日易西沒悠悠天地間二物何飄忽促
迫於生人綠鬢成華髮昧者不自知終朝常汨汨利欲
沈厥身其本已先廢孰若繕真性以自固靈骨

老梅何偃蹇雪時方始花自守歲寒性不肯隨春華隱
人適然見移植溪水涯瘦影無陽艷清香絕淫邪閒靜

如隱人隱人心所嘉樵牧無見侵以貽隱人嗟

自昔真僊道恬淡而無為以之固靈根遠寄或可期秦
皇與漢武縱欲不知疲既已長中國復欲威四夷其性
忍而愎舉非僊者資天監常昭晰詎容肆謾欺不自省
其衷妄冀苟得之所願竟無成徒為後人嗤

天樂歌

鳥樂在深林魚樂在深淵人樂在深居不深常致患吾
居今已深柴門草樹間油然自成樂其樂難具言問吾

樂伊何一皆得之天至樂任天與不知然而然朝樂暮
亦樂此樂真具全吾歌天樂歌聽者慎勿宣

夏雨應禱

當夏而閔雨百神靡不宗精誠既上達所願神輒從觸
石忽生雲初亦無多濃東風借其力斯須滿諸峯稍久
彌六虛油油復溶溶炎歊化清涼密布難知重雷電發
靈響潭湫起飛龍甘霖罔不周非止千里封槁苗淳然
興連疇遂芄芃焚香拜天賜歡聲徧羣農當書大有年

賦食皆足供公私有餘羨露積如崇墉誓言為酒醴報祀於秋冬降福宜孔皆萬國稱時雍

感時

厚地產桑穀為民衣食資井田取什一公私兩俱宜今者異古昔苛征常倍蓰倍蓰猶未厭泛索仍無時官因字民設胡為反害之盡以應上求民病莫能支織者恒苦寒耕者恒苦飢空村絕雞犬敗屋多流離白叟與我言其言乃如斯老夫為悲吟聞者當致思

迂拙

迂拙不任用於焉老雲耕曾非尚高亢聊復辭送迎孤
蹤類山鹿幽意存柴荆春薇擷初茁秋菊餐落英倦來
唯宴默興到或遊行明目煙霞色清聽風泉聲萬象畢
昭明四體常安平縱誕殊有適利祿非所榮外物遺天
地真心齊死生但願絕知聞怡我閒曠情

拙叟

拙叟百念無眎身同木石有客問生涯笑指松與栢客

言人之生當有資生策縱曰遺聲利其能去衣食松柏本無情於子知何益吾言子姑去吾倦將偃息反關據槁梧隤然竟終夕覺來寂無有雞叫東方白

題醉翁圖

所畫者誰子將非高陽兒滿腹常貯酒何異於鴟夷陶陶以自樂禮法不可縻釀酒用老瓦漉酒脫接羅寧復問升斗豈嘗辯醇醖終日但兀兀一卮掌中持頗謂有妙理非人所能知飲罷忘百慮袒跣行斜暉大笑沈湘

人獨醒亦奚為

山棲

十載棲山楹影不入州縣地偏交易絕心閒體逾健脫
粟無宿儲壞衣多斷綫人皆為吾憂吾樂未嘗變上下
巖壑間幽賞不知倦一一全天真斷斷非飾緣西峯煉
金客邂逅時相見談笑輒忘形殊亦諧素願古者賢達
人道或在貧賤往躅良可循維以謹繾綣

閑居

四體本虛空萬物猶土苴以此存內照頗覺非外假存
亡楚人弓得失塞翁馬但使吾道存正欲知者寡

蕭然謝塵境日夕心悠哉厨空無鼠雀徑僻多莓苔麻
衣足自蔽柴門詎曾開坐聽風葉鳴疑有幽人來

間人了無營偃臥常至午暖日到床前落葉滿籬戶或
時散幽步東岡復西隴誓此畢餘齡青山不相負

雖貧常晏如兀兀坐山舍案有麻衣易門無俗士駕虞
人不從招尼父亦待賈狗苟復蠅營此事吾不暇

言交

結交貴同心心同難間疏嘗聞膠漆固亦曰金蘭如君子要其終小人變厥初宜當作管鮑慎勿為耳餘

又言交

道交淡如水世交甘如醴結交當以真審交當以理道交似無情曾不異生死世稱刎頸交未必能終始君不見昔者陳餘與張耳

野性

野性樂疎曠從來厭風塵孤寒無所資屈身隨衆人貴
遊棄疵賤不能強相親蹉跎三十年客路常清貧晚來
歸山林麋鹿為我鄰萬事不掛意一一皆天真同流乃
知此難與俗子陳

白日苦短行

白日常苦短無方便遲延始見出暘谷忽已沈虞淵迫
促於生人無一能永年豐質成槁項鬢髮變華顛雞鳴
逐聲利夜分未遑眠奄化同草木沒沒歸重泉或復自

超放導引求神仙喬松在何許亦若茫昧然必當實根
抵塵物皆棄捐德性貴純正文華在昭宣道與天地準
萬古唯聖賢景行不可忘抒情為此篇

有適

破屋無兄弟拙者所棲息衡門未嘗啓聲利詎能迫資
身不求備百事遂省力糞埽皆可衣草木皆可食春來
有餘暇手種豆一席秋深葉黃隕霜莢漸開拆收歸籬
落間早晚自剝擊藏之於瓶罌粒粒堪愛惜窮冬火鑪

頭時喚山猿喚猿去吾亦眠巖房愈幽寂口誦寒山詩
頭枕麻衣易于以陶性情終然遠憂責頗謂貧非病更
覺損勝益與其稱梗枘未若作樗櫟傍人莫相問老子
方有適

秋興

秋雲滿茅屋秋風響楓林杖藜步幽徑落葉數寸深悠
然拾葉歸寫我閒中吟坐客興亦閒彈入青瑤琴曲終
各無語山水遺清音

喜雪

北風吹同雲慘澹日已夕枕上聞霰零須臾映窗白曉
來籬戶間平地忽過尺羣峯靜繚繞彌望無寸碧棲鳥
噤不鳴空山斷行跡古木摧危梢荒崖失竒石瑞色徧
天壤膏潤歸宿麥螟蟲深入地沴氣亦消釋豐年信可
占豈復憂民食野老不知寒歡聲動阡陌聊作喜雪歌
仰謝天鈞力歌長遣誰和寫寄西峯客

感春

忽聞春欲去園林謾遊矚輕風散餘紅細雨滋繁綠
繁似歡榮紅散猶慘辱因悟人間世萬事易翻覆賤或
登青雲貴或成赤族禍福無定端往往相倚伏那知今
日歌不是明朝哭書以為世鑒得志毋縱欲兢兢如履
冰坎坎念伐輻苟能閑此理堪追聖賢躅

曉步十韻示山友

隱居絕他營曉步緣澗壑水深魚影閒林密鳥聲樂晴
空極清明孤雲何住著原窮得危磴路轉見橫約嘯響

空谷傳吟情古靈覺所遇皆隱淪論心遺厚薄在山無
小草忘世勝大藥餘生豈須計此興諒非錯其適在閒
曠何用嫌落魄書此以告君狂言君勿噓

夜思

靜坐四無鄰看山待明月池邊暑氣盡竹上涼颼發伏
翼打窻飛孤螢隨草沒予心適有會還就幽人說

事君盡忠行

為子當盡孝事君當盡忠凡人不知此斯與犬豕同臣

子固貞亮君父或顓蒙乃知守忠孝亦繫於遭逢比干
忠以戮申生孝而終忠戮得稱仁孝終宜曰恭古今每
如此片言安可窮炳然垂竹帛予以開盲聾所遭雖若
彼力行誠在躬於焉二本立足為百行宗忠孝苟純至
聞望當昭融此理亘萬世來者能無從

鬼鬼山石行

山石何鬼鬼孤松何疑疑其大踰百圍其高過千尺廣
屢需梁棟求之若匪克梓人一以視斤斧見促迫牛夫

競牽輓輸入王侯宅觀者如堵牆靡不重嘉惜鏤刻以
為工丹青以為飾巍然在雲霄七貴所棲息梁棟豈不
美殘生良可哀寧作南山松毋為廣厦材

四序

四序迭遷變春光獨豐茂生意徧羣物動植不違候唯
唯塞鴻歸喔喔野雉雊軟草鋪作茵芳葩粲成綉唯有
靜者徒抱道終莫售直躬在林藪朝夕飯藜糗與時既
乖舛輿臺或加詬俛仰天地間此理終莫究

狂吟

槿籬三四掩荒竹百十箇無人扣柴扉偏稱潛夫臥夢
作野雲飛覺來松日墮隨分有狂吟吟長不須和

自紀

生無機巧姿所貴唯實踐探玄髮盡霜窮勝足重趺渡
水識歸源看雲悟舒卷寧教身不遭頗謂首難俛餘年
辭畏途滅迹向絕巘形骸未全枯囂煩幸俱遣中心本
難誣萬事不欲辯手把楞伽經交趺對鑪篆

秋興

昔人苦悲秋我獨愛秋色無雲天萬里遠嶠出寒碧楓
林葉如丹溪水清見石飽雨豆莢肥經霜粟包拆連疇
稻正黃冒野蕎亦白籬菊忽忽盈把山萸又堪摘日月如
過鳥良辰敢虛擲青猿頗會意為我具短策西風吹破
帽野興在故屐不憚登涉勞遠訪巢居客此客更可人
分我漁樵席人生貴適意何必累形役

早睡

天寒常早睡不待日光斂恐礙山猿入柴門未嘗掩落
葉打窻鳴枕間疑雨點起視西峯頭月殘星閃閃

居山樂

居山樂無涯三徑富松菊山體靜吾心山光悅吾目春
來山蕨肥秋後山田熟未必王侯家有吾清淨福

暑夜步月

畏暑不復眠空階踏涼月冰輪了無翳明可數毛髮夜
久肝肺清如燠太古雪擬換飛僊人乘鸞上寥泲

贈梅

見說春方還春猶未相識山童指梅花言是春消息梅
花亦含笑道我是知音遮莫隨桃李貪榮變此心相看
出此語愛爾良獨深聽之儻不疑足以為規箴

夜興

萬緣不相涉默坐調四肢天理靜中見物情閒處知長
風掃重陰皎月生東籬寒蟲唧唧鳴亦各知天時悠然
發清興朗誦淵明詩人生百年間汲汲奚所為賢愚雖

有殊同為來者悲為語高世流有酒當自持

散人詠

金散免鎔冶木散逃斧斤人散外榮辱所以為散人世
皆賤吾散此散吾自珍偃蹇不任用庶足全其身

初夏同趙東閣西里諸公山行聞鶯分韻得隔
字

今日天氣清聊試登山屐共看雲外峯分坐澗邊石絕
境不逢人啼鶯似留客一聲無處尋還被青林隔

秋夜感懷

秋山夜無人蟲在草根泣明月照高林虛窻風露入生
年四十餘萬事未有立東西岐路間終歲常汲汲雙親
死經年宅兆久完葦兄弟亦貧窶於此不暇給回首思
故園愁雲滿原隰交朋閱千百存者已無十顧我枯槁
姿奈此短景急終宵不成寐起坐千慮集至人乃忘情
徬慕安可及唯作無生觀去此衣袖濕

烏棲曲

白露生庭蕪明月照栖烏
栖烏啼不已閨人中夜起
起視西北方翩翩鴈南翔
幽燕戍未返云胡不悽傷

食齋

生無食肉資飯蔬幽壑底
朝采南澗芹莫擷東籬薺
此中有真味豈必鱠魴鱸
何曾萬金饌惡諡不可洗

欽定四庫全書

潛山集卷三

宋 釋文珣 撰

五言古詩

感興

一身素貧窶四海長為客
客塗不可窮老去少筋力
賤者人多棄風霜變顏色
歸來旅亭下倚杖三歎息
隻字不堪煮萬卷亦徒積
未如田舍翁耕桑了衣食
身世蟻旋磨日月駒過隙
百年竟何為鬢髮空皓白
乾坤渺難

馮倦羽復奚適一枝願深栖庶以避彈射

途中感興

悠悠涉長途西日照禾黍回首睇關山故鄉在何許秋風吹櫟林憂思莫能禁同懷不可見日暮空沈吟方矜美少年倏忽傷醜老百年能幾何況復不長保存者日已少逝者日已多榮華亦難恃薤露有遺歌

金竹峯

雙檜高亭亭遙見百里外恍疑香烟幢亦若羽葆蓋秀

色何其多貞心固常在化龍想非難坐待風雨會

歲暮旅思

歧路不可極歲月亦易邁朔風振寒威行子無衾裯厥
生良可哀半世空悠悠知音盡淪沒明月難暗投親朋
復遐阻日夕生離憂

世路

世路饒風波生平有終極東西苦漂蕩鬢髮非舊色倦
鳥懷安栖老馬思故樞萬類雖不齊彼此各有適富貴

亦偶然何須置胃臆

遊興

端居念局促聊復起行遊褰裳涉淺瀨隨雲陟高丘時
當孟夏月嘉木清且稠衆鳥相和鳴關關無時休頗覺
愜幽抱遂爾忘百憂解衣坐磐石濯足臨長流心空了
無取身閒方自由寄言養生客於此同歸休

閒人無所管扶藜散幽步古路絕遊塵霜林葉自雨坐
石聽流泉頗得空寂趣雲外巢居子邂逅兩相遇語久

谷忘還見月出深樹彼此無滯情忽散同烟霧歸來夜
已深山衣浥清露隕然竟終夕不復脫芒屨鐵鐘驚夢
回斗轉東方曙重欲見巢居雲深無覓處

不暖亦不寒氣候正清淑岸柳盡垂絲園筍已成竹山
禽屢催喚拄杖情又熟出門信吾步豈復計遲速渡水
或穿雲山陰又溪曲悠然得真趣此外非所欲

昨日出城南行

昨日出城南戰陣如雲屯兵刃欲相接殺氣方騰掀黃

塵塞天地日月為之昏壯士仗忠義不忘喪其元奮然
為前驅誓報明主恩卒伍皆賈勇翕合無異言唯欲紆
禍難豈辭屬橐鞬元戎既啟行旌旆交續繒謂當奏凱
還受爵效屏藩衆寡力不侔傍復乏外援戰久俄敗衄
靡聞鉦鼓喧軍中紀律嚴致死無敢奔全師同陷沒千
萬無一存肢體膏草莽血流成川源國雖加恤典莫能
返其魂白骨蔽四野鬼哭多煩冤懷哉唐虞君大德罔
虧騫垂衣成至治萬國皆晏然齊威雖霸主亦賴仲父

賢九合不以兵仲尼所稱傳兵乃不祥器聖賢嘗戒旃
人苟服其仁斯亦何用焉

不屈

屈身必受制屈志必違仁受制已則辱違仁道則屯身
志兩不辱度幾德之純以此率其性乾坤一閑人

閒身

閒身孰能戰蕭散隨所欲涼風入芒屨緩步秋塘曲清
波淡無涯予以滌心目魚鳥亦忘情何如在濠濮

閑身出塵表世鞅詎能絕真若寒崖松凌傲幾霜雪枝
葉任生枯唯自老根節更有無心雲油然足怡悅

釣者吟

吾謂釣者徒今古不同流今釣曲為餌古釣直不鉤直
釣不在得所得過於求曲釣志在得所得良可羞乃知
今古釣不可相為謀好古不好今頗若能自修試問羊
裘人亦合子意不

西村老叟

西村逢老叟事事皆天真髮白不記歲鳥鳴知是春耕
桑了衣食兒女俱和循日暮野中歸荷鋤仍帶薪見人
但恭敬塵滿頭上巾未嘗識都邑豈聞有君臣我疑百
世下猶有羲皇民

梅花

梅如姑射仙桃李終難並雪底暗傳香泉邊孤照影清
聲聞麗譙至味入鐘鼎愛者雖繁多知名獨和靖隱顯
不同功因之發深省

遊仙

吾嫌人世隘忻同古仙伍寂爾契冲虛與之相爾汝晨
多遊玉清夕每憇園圃身已外乾坤飄飄自遐舉

結交真仙徒翛然凌太清體與虛無合心同日月明逍
遙龍鳳駕縹緲雲霓旌豈知區中人狗苟復蠅營

喧囂非所事靈府自怡神食每吸丹景飲常漱玄津洞
覽周八極內照唯一真體妙含至精希微難具陳

高升洞陽界論道太常前與彼羣仙游一夕千萬年眼

中屢曾見滄海為桑田時同宴玉醴廣樂聽鈞天
超然塵垢外元化實希夷吾生有道骨中心常慕之感
通影響然高真不遐遺導我歸帝鄉雲輶共委蛇

青峯萬仞高雲路多盤紆松栢冬不凋懸溜成石膚上
有逍遙天元心與道俱長揖謝塵凡放情常晏如唯服
玉石脂千年貌不枯命我登仙壇壇名號玄都天風起
西極日月生東隅神仙遞升降鸞鶴相號呼拍肩友洪
崖揮手招麻姑流目極昭曠使我隘九區山中有至樂

金安四子集
卷三
功名焉足圖

平旦

平旦氣偏清境界復深窅
初日上東溟高峯最先照
會意發長吟何似蘇門嘯
不必諧宮商自是山中調

清遊

清遊興難窮倦就苔磯坐
為愛松風涼不知寒日墮
鹿下飲溪流猿來摘山菓
我本貴無聞何用人知我

桐溪

修梧散瑤碧溪水涵清漪凡翼母飲棲鳳鳥當來儀山人以自鳴俗士安能知陵谷可變遷此志當勿移

旅懷

北風吹荒林蕭騷起寒聲客子耳中間展轉傷離情親朋不在眼他鄉但嫫嫫狐死亦首丘奈此終身行

琴泉

子期不可作伯牙終絕絃泠泠太古音在此幽澗泉泉流如碧玉老僧聽不足後夜月明時還向泉邊宿

逝水

逝水向東流前後浪相續尼父達機兆川上歎不足人
生天地間百年誠短促菁華草頭露光景風中燭兩鬢
成枯蓬蕭蕭不再綠那知今日歡不是明朝哭所仰唯
聖賢亦復歸鬼錄而況頑冥者厥身沈利欲隨流不知
返終世常僕僕大化一朝盡腐滅同草木豈若黃綺徒
居然在空谷于焉自逍遙其人美如玉吾生千載餘猶
知慕遐躅寤寐斯不忘耿耿在心目

水西

水西多好山山光足娛人一重復一掩比比如魚鱗居
來三十年仙佛皆其鄰魚鳥不忘情朝暮長相親遯世
乃吾性非因來避秦曾不事緣飾庶事全天真早嘗知
夢幻視身若無身無生以為樂此樂難具陳

生年

生年已六十所歷更萬端富貴等浮雲變滅不足觀身
如冬嶺松獨立守歲寒心如古井水到底無波瀾吾道

即古道處今良獨難是非不易辯長歎復長歎

曉林日融葉霜滴漉如涕泣

槁葉殊可憐寒風吹女急天復雨嚴霜恐女難自立零
落歸草莽晚悟嗟何及朝陽達機兆為女增泣泣

屏迹

江湖厭風波巖壑事幽屏柴門絕往還自閱朝昏景日
出烟霧消鳥散松竹靜須臾日西頽餘暉在高嶺短生
亦如寄舉世孰能省願學遠公儔終然謝塵境

夢覺吟

百年如大夢夢裏幾紛馳覺後識為夢夢時曾未知吾
生今已覺不記夢中時在夢人無限昏昏信可悲

吾心

吾心靜而貞是乃出天稟驅之入塵樊違性豈不甚所
對非同流欲語口還噤世塗機穽多動足常慄慄今來
返中林夜卧始安枕山薇既可餐清泉又堪飲布衣極
相宜亦不羨文錦斯謀良已臧餘生不須諗

枯樹謠

高木引修藤藤東樹身死慎莫進小人終當負君子君子思報德小人易忘恩所與苟非類反為禍之元誠能遠小人終身乃無患世莫輕斯言亦足以為諫

道狹踟躕行

道狹難並車相逢苦踟躕踟躕將何念所念在康衢康衢平如砥八達無斜迂君子之所履所履常虛邪折旋應規矩永矢無越踰有時亦壅底久之還廓如狹道殊

徑捷小人所爭趨夙夜不遑止草露多沾濡勢利迭相
傾旋踵成遷渝迷眩不知返逝將致淪胥康衢吾所遵
狹道吾所吁遄車返山林守一以自娛大道既凋喪安
能復區區

南山松柏章

松柏何夭矯南山何峻嶒松柏有常性南山不騫崩南
山人所仰松柏人所承尋常部婁間瑣瑣唯薪蒸彼無
高志徒眡此宜自懲堅守歲寒操亦當慎攸憑

青松篇

西山有孤松亭亭高百尺冰雪屢凌厲難變青青色東
園盛桃李搖艷矜春容少皞布秋律掃地無遺蹤青松
固真心桃李之堅操君子與小人自古不同調寧忍學
桃李誓言作青松偃蹇終不屈傲睨秦皇封

箴放心

養形而放心譬若樹抱蠋表似內已虛識者為憺怛形
瘁或當腴心蠹不可活先民有格言勿使本先撥

天竺中夜

白露變氣候促織階下鳴切切鳴不已倦客心自驚中
夜攬衣起星疎松月明念彼同懷人迢迢隔山城此身
無羽翼不得東南征聊作相思吟寄此千里情

養疾

介持無門徒室亦如垂罄隕然類枯株聊以養衰病朝
來啟籬戶落葉滿苔徑流光遽如斯脆質安能競虛籟
起高林助我發長詠

馮深居長余二十三歲趙東閣長余二十二歲
周汶陽長余一十七歲皆折行輩與余交淳祐
辛丑同訪余於竺山有會宿詩距咸淳乙丑已
二十五年矣痛先覺之凋零感吾生之既老因
成十韻以寄死生之情

三老皆達人虛受無華芥筆陣絕縱橫詞源極澎湃
時身屢蹇志道心不解放浪事物表若曰宇宙隘求我
於空間豈識有機械留詩在幽窻足以鎮山怪神靈謹

守藏光豔無減殺今朝一長吟頓使老疾差三老不可
作吾心亦遄邁中心曷能忘長吟復長喟

晨興

晨興啟蓬戶當面來清風初日麗喬林光影尤玲瓏悠
然與心會物物皆沖融得喪豈吾事此道足自終

山蔬

山蔬有真味肉食者不知老我於空林自愛園中葵種
蔣俱有法采擷初無時置之折脚鐺燎以枯松枝芼之

以薑桂是乃性所宜嗜此已成癖自覺甘如飴既足果
吾腹何用五鼎為衆欲不干慮出處常委蛇笑傲泉石
間萬象皆吾詩我已自忘我人知我為誰

百年

百年如大夢夢中誰到老貧賤固可憐富貴亦何好舉
世盡蚩蚩醒寤苦不早自古知幾人獨在商山皓

百年亦何為終歲常壅坎玄裘不掩脰素髮自垂頷吾
親歸夜臺益重霜露感仰視天一方星河同慘澹

雲際獨坐

雲際坐磐石悠悠兩無心
波靜白鷗下山寒黃葉深
幽人住何處午磬來清音
日暮不能去羣峯生夕陰

山人居澗上號澗居因澗作池名鑑止為賦是詩

幽人臨澗居為愛澗中水
泠泠出雲竇泱泱漱石齒
流行本無意遇坎還自止
坎深遂成池寒光映窻几
予以鑑禪心清淨絕塵滓
唯供種白蓮不洗聞堯耳

苦益菜

苦菜吾所嗜意與食藥同古者以益名頗足昭其衷秋
花更清妍綽約冰雪容恍疑姑射仙或如采芝翁菊以
彭澤顯蓮以濂溪崇此獨無知音沒身蕭艾中人生天
壤間用舍為窮通草木豈不然一皆係其逢

哭李雪林

昔者聞盧殷頗為世所推讀書過萬卷盡以資於詩復
聞孟東野氣清而色夷平生嗜章句有甚於渴饑二士

舉無子所學竟不施昌黎為買棺又作銘墓辭相去五
百年雪林酷似之春谷古人徒生死相維持亦為立佳
城著文樹穹碑林兮信不忘千載修名垂

梅友

梅有歲寒姿桃李非其偶冰雪見凌厲斯固梅之守伊
人清且妍是曰梅之友臭味得所同不在金蘭後溪烟
隴月間幽期未嘗負中路勿棄捐友道貴長久

吾年

吾年未七十頗覺漸昏耄舊事盡遺忘獨餘山水好天
寒附葉火塵埃滿烏帽客至欲逢迎無奈筋力耗君當
恕衰翁遮莫謂予傲

吾年易逾邁感慨難具陳齒髮半缺禿肌膚多不仁屏
迹於空山幾與木石鄰憶昔少年時秉志將求伸所交
四方士一一非常人論文窮道要日夕長相親逝者若
流水存者猶參辰輾轉空懷思欲見終無因新知棄玼
賤坐臥唯一身餘生諒非久當為灰與塵存亡固可念

亦復徒傷神於焉息吾慮靜然全天真

秋晚懷浙東故人

遊人未歸來芳草又還歇
悵望江東雲久負山中月
扁舟在何處一水不可越
相思千里間日暮飛鳥沒

紀事

似道涉之不肖子也少為博徒游蕩無度
憑附椒房之寵謬叨閭寄以敗為勝上罔朝廷
躡躡鼎鼎斷喪國脉納侮北鄰兵連禍結三

宮隱憂雖蒞醢不足以謝天下而位亢志驕
陰謀篡逆言洩於夏金吾金吾欲誅之懼而
宵遁雖聖恩寬大不即夷滅使其微有人心
當是媿死遂賦詩以紀其實云

庸賈狗鼠輩齷齪無足觀少小為博徒狹斜恣遊般憑
附椒房寵濫吹於王官匿罪而言功虛聲尚欺謾以之
致鼎貴真如沐猴冠擅命十五年肆毒侔蝶蛭仁脉為
之絕善類為之殫納侮於北鄰徵盟日囂謹兵戈滿四

海天步極艱難鄂漢距江淮列郡多創殘人命若菅蒯
聞之心膽寒王家急軍食耕者不得餐罪大已難追猶
思揜其奸駕言督諸軍翱翔向江干小器不自量妄冀
於曹瞞潛欲移帝室微辭啓其端賢哉夏金吾直氣生
忠肝立欲碎其首無奈師旅單姦謀既已洩跼蹐方自
歎畏誅竟宵遁鴉鵬鍛羽翰逆賊幸屏迹宗社得再安
勤王畢雲會聖慮行小寬祖宗德澤深國體宜無癥指
日恢中原以盡萬國歡

為先雲洲賦塵外地

狂賈何人斯曾莫犬豕若包藏竊國機直爾棄天爵逆
罪浮草莽盜術逾跼蹐死於荒陬厲肉不中臍竄賊
亦云晚帝脉以微弱倉扁皆拱手神聖難救藥興亡誰
召之禮樂至銷鑠兵戈滿天地騰沸猶鼎鑊億萬蒼生
命枕藉委溝壑寰中蕩無章吾徒曷棲託賴有塵外地
猶堪遂飛躍泉石盡清奇烟霞地參錯有客賦歸來楸
枰見高著真是離聲名非唯解纓絡山心極閒曠雲蹤

忘住著長歌松月高晏坐林花落游行狎漁樵追隨任
猿鶴他年四方志此日三生約終逃小草譏嘉遜自成
樂於焉以求志為記良不惡

過賈似道葛嶺舊居

順逆人獸心成敗翻覆手鬼神不相容子孫豈能守昔
者過此門歌鐘會羣醜今者過此門閭然已豐蔀羞死
滿院花顰殘數株柳空室走鼯鼯荒池長蝌蚪轉眼即
淒涼况復百年後積釁多自戕盛德斯可久富貴如浮

埃於身竟何有為謝高明人非義慎勿取

惟初

惟初結髮時志氣凌蒼昊飄然去園廬名山縱幽討流
光暗相催於今已衰老滿眼皆少年誰堪寫懷抱潛蹤
寂寞濱蕭颯同霜草謂可安餘齡異俗驚我倒頗解空
王宗懷之以為寶世故等浮塵棄置勿復道


世情

世情多反覆衰榮難預卜本是昔時笑翻成今日哭故

鄉無舊業客身同草木紛紛輕薄兒誰能顧幽獨雖無
祿資身喜有山在目得失何足論長歌倚修竹

貧賤詩

貧賤交親絕形影自相弔清泉白石間朝夕事吟嘯甌
墮何足言灰死不須溺達人乃知此寧免俗士誚



金定四庫全書

卷三

欽定四庫全書

集部

潛山集卷四至六

詳校官庶吉士臣李傳熊

主事臣呂雲棟覆勘

謄錄監生臣沈霽

謄錄貢生臣張大同

欽定四庫全書

潛山集卷四

宋 釋文珩 撰

五言古詩

酬李漫翁暑中見寄韻

羲娥不停轂，催暑到茅屋。
萍蓬無地頭，桑梓念天目。
古吟寓深情，時事堪痛哭。
餘生竟何歸，行已變陵谷。

貧房暑中寄詩依韻酬答

谿翁若冰雪，明淨不受涅。
經歲斷知聞，使我心苑結。
佳

句來清風足以灑炎熱山中有奇事遲向秋深說

依韻酬葛秋巖陶體四首

山林自多趣况此晴和時我友貴然來相娛以琴詩倉
庚遺好音薰風發清吹悠然與心會安能遽忘茲

大化無端倪至道絕馮仗委身於一靜足以去羣妄死
生亦寄耳遐齡豈吾望伯倫稱達人胡為未忘葬

吾生一無營終日衡門下棲遲已成樂豈羨臺與榭相
彼常汲汲而我獨多暇時聽螺祝兒於以知物化

東原風正和西山氣尤爽坐我於其中此心日以廣腰
間豈須重眼下何必兩顏原陋巷居歌有金石響

效陶四首用葛秋巖韻

坐石滋南風幽抱和且衍志唯在山水身不關治亂終
曲遂忘言舉目送飛翰所得皆天真初不加習翫

山深自無暑五月草樹寒頗有遯世樂得之亦非難巖
翁我同流邂逅成清歡回首功名人瑣瑣不足觀

眼前幾富貴變滅同浮烟舉非吾所欽眷然思古先窮

達無二道彭殤可齊年中心既昭徹萬象皆澄鮮

我居本山林茅茨蔭嘉樹骯髒塵網間歸心自西驚吾
駕今已返終然守貞素每思夜氣清起坐天未曙

野翁

野翁百不為白髮老巖澗寧肯慕膏粱且復飽藜藿故
交非不多盡作風葉散餘生雖獨存反觀亦如幻

山居答客問

富貴有何好祇以勞其形吾居在山林四體常安寧寒

緝沼中荷饑斲松下苓蒼苔沒幽徑白雲度疎櫺明月
石上看清風枕間聽滅惑生智燄破塵出空經真如寐
而寤亦若醉而醒此外非吾事眠之等浮萍誓不出籬
戶期以終頽齡君如不吾信重當問山靈

遣興

吾方慕孤貞俗苦尚馮附一身天地間瓠落如大瓠短
寄無百年倏忽已遲暮平生清淨禪猶嫌被詩污洗除
豈誠難心空滅萬慮更當尋亮公竟入西山去

寓形

寓形宇宙間治身猶治木要在直而方毋使圓且曲直
方固違衆吾心以為是圓曲雖適時吾心以為恥人由
圓曲富吾用直方貧吾心雖不移予以書諸紳

黃葉

吾心愛黃葉不起於南金九月秋風高柴門積來深一
一自掇拾書我白頭吟吟成意誰與拄頰對遙岑

寄友分得客字

夜來有清夢夢見山陰客宛然過蘭亭分吟坐苔石曉
聞在湖寺揮麈論經席會面安可期相思春草碧

吾生

吾生少壯時窮力在經教一心融萬境頗亦能致效老
來更脫畧山水隨所樂今成信手碁勝負不復校

人生幾何行

人生能幾何百年三萬日一半睡中消餘壽或難必鐘
鼎與軒裳總是牢籠物貪夫所甘心宛轉無由出富貴

者常勞貧賤者常逸所以箕山人不為唐堯屈

人生百年間何殊旅亭客少壯不可留漸覺衰老迫縱
使功業成誰能免形役長歌歸去來山中煮白石

冬日山中遣興

始見迎秋氣又復換玄律寒山何蕭蕭飄風何弗弗雙
丸遞隱見百齡信超忽慨念同遊人大半成異物吾年
亦云衰逾六已望七不唯齒髮變舊聞盡遺失死生無
定據萬事難固必且以永今朝奚須計明日息影入山

林曾不厭深密賢哉龐德公萬世稱隱逸

重阜崔嵬行

重阜何崔嵬遙瞻北邙路曠野無人居高低盡丘墓不知
古與新落落似碁布下有荒草叢上有白楊樹樹頂嘯鵓
鷲草根穴狐兔嗟哉昔為人妻子相愛慕豈知易殂落到
此長別處天地雖好生安能暫留駐夜臺杳冥冥千載竟
不曙託身同草木坐受螻蟻蠹衣冠變成塵精靈自相語
親戚不重過他人豈能顧聽我蒿里歌年命如朝露

與雲耕重會復別

久別思見面重逢反成悲相持問年紀各在桑榆時道
途筋力殘玄髮成素絲時命苟不遭有才亦奚為榮華
既非願但願亡寒饑眼前且相慰老別難再期此語亦
良苦君心還自知

別山中友

人生貴適意窮達奚足論此意君能知方喜吾道存于
心既莫逆彼此俱忘言胡為又當別誰能不消魂

閉戶

閉戶日無事山光滿盈几飯餘曲肱睡一覺頗酣美心
平不作夢境寂如止水山童為煎茶茶熟我當起

夜歸

天氣殊清和山中多勝踐沿流采香芹穿雲得芳薜幽
懷日以舒囂塵自茲遣乘月返茅茨倦足不復洗
生唯淨命食持鉢向人境莫夜歸茅廬月出山愈靜處
處聞泉聲行行踏松影洗足便安禪雲深石床冷

煎茶

吾生嗜苦茗春山恣攀緣采采不盈掬浥露殊芳鮮慮
溷仙草性嵯峨間取靈泉石鼎乃所宜濯濯手自煎擇火
亦云至不令有微烟初沸碧雲聚再沸雪浪翻一盃復
一盃盡啜祛憂煩良恐失正味緘默久不言須臾齒頰
甘兩腋風颯然飄飄欲遐舉未下盧玉川

芝田老師索余作松石因書此詩

學畫同學書藝精人已老三年始向學一紙未能好墨

淡石不蒼筆枯松亦槁芝翁索此圖遺笑應絕倒

樗散

樗散不任用居然老空林柴門絕車馬徑草三尺深靜
對西山雲頗覺諧素心此外非所知誰言有華簪

藤杖

柳標古藤杖偃蹇如虬龍伊昔訪隱人得之天柱峯賦
爾如良朋出處常相從渡水逾萬折穿雲或千重忽於
風雨時狡獪誇靈蹤使我失馮倚瓠落無所容

為顧美山賦五字田

寶此五字田不羨千畝藉冥搜為播種發言皆黍稷梅
山老吟農良已著深績終然乃有秋不負平生力

湯婆

野翁有湯婆愛逾美淑姬眠之若彭亨虛中而無為冬
日則飲湯身唯一衲隨曾不浣脂粉簡潔良易資終宵
暖吾足貞靜無邪思德音之所同可作偕老期誓不中
道絕若彼氓蚩蚩作詩以遺婆婆聽當勿疑

讀郭文舉傳

衆人務苟合達士羞雷同不可相為謀真成馬牛風我
愛郭文舉乾坤一冥鴻

送僧東歸

今朝送君處草色如許新後會既難定別愁那易陳分
手限吳越烟波渺無津雲山更重疊歸與何峯隣憑人
問消息或恐非其真不如早重來勿使山猿嗔

祭坦仲履

仲履真吾徒敏慧出流輩比玉無纖瑕方珠絕微類子
心如秋月皎皎長不昧子身如閒雲出處極自在相從
逾十年不見時俗態愛子靜而文喜子和而耐語子以
玄微一一能領會今子隔重泉使我增感慨酌彼清澗
泉為子供一酌魂氣誠有知歆監儼如對

同友行山逢隱僧語

我本忘世人有志在巖穴欣逢會心友提攜步林樾雲
中野僧居樹梢清磬發不憚登陟勞遂得造石窟門前

羃蘿薦座後翳松枯結草為三衣降龍在一鉢問我從
何來執手道契濶食我青精飯語我頗諄切教我去衆
巧使我守一拙我誠服其言畢志不敢越他年定依止
相與定晚節萬事盡棄捐飲澗茹薇蕨

寄教西岑

西岑我同流常惜會面疏秋深來舊京一嘗造君廬感
君故情深館我於恬虛十日更倡酬閒蹤頗虛邪人事
那好乖扁舟賦歸與茫茫烟水隔無使堪寄書萬玉森

簣簣孤峯麗芙蓉掛夢於其間栩栩復蘧蘧以我常思
君知君亦思予何時重攜手使此苑結舒

炙背

老身不能寒心唯愛冬日炙背蓬門下暖氣浹肌骨自
謂人間世此樂居第一雖曰狐貉溫功莫與之匹山居
人不到獨坐快捫虱

贈同志

我本無生傳涉有乖素願百年直寄耳倏忽如過電猶

記學語時老色遽滿面富貴非所希吾道在貧賤往事
絕尋思殘生喜彊健忘機有白鷗消日賴黃卷今辰扶
杖出窮探不知倦與子偶相逢抵掌說嘉遯同歌紫芝
曲共飽青精飯世人不相知心通亦何悶

寄贈王子靜

子靜野鹿性蕭散逃繁機倚詩以為田曾弗憂年饑詩
腸有餘積詩貌無多肥朝吟暮亦吟吐屑常霏霏糟粕
三百篇自能發天機兩脚走黃土頗若知音稀多時不

相逢念爾魂夢飛何當抱詩來共食山中薇

贈隱僧

高僧謝人世誅茅亂峯曲三衣不着蠶一飯長分鹿露
滴秋逕松烟蒙曉窻竹真隱澹無營怡然心自足

問李簣房疾

簣翁非時流溫然古君子我雖異教人臭味畧相似四
月不見翁相望隔煙水石壇忽來前言翁乖攝理真體
本無病請說病原委乃知為蒼生常欲致平治神明所

扶持厥疾自衰已秋日定擎舟賀翁勿藥喜既為蒼生
病須為蒼生起比壽於廣成與宋相終始

重會磬桂山

桂山吾友于壯歲即相親跌宕去鞿縶出語必驚人倏
爾罹世難東西各全身十年不相逢有若參與辰偶乘
雪舟來見翁西澗濱相對恍如夢彼此白髮新抵掌話
疇昔故情一何真遺我白雪章字字無埃塵長歌山水
中鏗鉉驚鬼神胡為又當別繾綣難具陳風前一回首

寒波渺無津他時定相思題詩附雙鱗

日夕佳

城市多溷濁溪山宜避喧山色日在門變態從朝昏悠然得之心真樂方自存此心誠不渝軒冕何足論

放浪詩

放浪遊名山山水悅人意窮日不知疲行行轉幽邃空籟如風聲奇峯似雲氣濯足就寒流憇錫投古寺長廊遇真僧妙語發清秘道我多隱情喜我無衆僞願言從

此始萬事盡捐棄相從了餘生共踐真實地

屏居

屏居泉石間所樂在閒縱山田與山果皆吾手自種禾穗已垂穎粟包初拆縫一飽既可期肯復作詩用

過野人居

閒人無外事飯餘聊散策路逢一老翁疑是避秦客招攜過別墅茅茨翳桑麥唯聞雞犬聲了無車馬跡自言入山來居然長兒息身將雲木親志與風塵隔屋邊種

桃李無言花自折原上耦耕人將非是沮溺遺世乃全
真何為牽物役從此數相尋幽期竟難易

酬清茗恭仲溫見寄舊詩追誌於此

吾生苦疎拙不解謀此身輾轉常寄食短褐如懸鶉徒
御捨之去往往嫌我貧達交亦良多安能強相親唯有
湖濱山於我如故人日夕與之對澹然忘主賓仲溫我
同流道我此意真新詩遠相寄可以書諸紳何時到清
茗相攜采白蘋

送僧

雲作達人性東西無定居重逢在京闕忽憶歸園廬水
宿傍江市山行見樵車後期難重尋握手空躊躇

吾身

東西南北人寂寞住巖澗年衰鬢凝霜客久衣絕襟何
須念梁肉且復飽藜苳猶患有吾身身死即無患
趨時非好好步步青山歸眼界絕塵垢耳根遺是非充
腸草木實被體雲霞衣吾貧豈當念吾願已無違

林卧

林卧歲月久閒襟頗孤清靜中觀庶類因之感予情木
伐以其材膏煎以其明獸檻以狡影禽籠以音聲人苟
矜智慮自械傷神形縱使功業崇或受鼎鑊烹今古無
不然念之殊可驚世用常致患時棄乃全生所以箕潁
客翛然竟遺名吾幸拙而愚冀可終餘齡

曉坐

夢破不成寐茅齋坐清曉他山已擊鐘獨樹初啼鳥四

體既調柔衆境亦深窈素書未終軸朝光射林杪任性
無外求一靜萬緣了何事塵中人百年徒擾擾

冬日山居

出門無所求藜杖常掛壁睡起日將午耳目有清適冰
池坼寒光雪簷響清滴道人期不來獨看麻衣易

山居

自為山居人夢寐亦安佚頗謂龜六藏全勝兔三窟性
中唯一真身外無餘物形謝即示已誰能問埋骨



釣雪老漁

彼漁者何人莫是滄浪叟萬頃自清心千山同白首忘
世但垂綸得魚唯換酒醉後任扁舟流到湘川口

贈別

古道久淪喪世塗堪痛哭鸞鳳盡收聲豺虎方擇肉君
從東方來求我山北谷君容一何臞我髮日已禿衰殘
兩如此寧不感心目又還別我去後期難重卜握手臨
路歧贈言以為祝一祝宜強飯二祝宜避俗

秋日有懷故人

山人出山去山鳥長相憶歲月能幾何諸峯復秋色孤
雲在何處烟水望不極悵悵多遠情飛鴻杳無跡

屏居

吾生本疎庸不作塵間夢屏居萬山中野性頗自縱消
搖鷹脫鞴蕭蕭散馬釋鞚天寒放麋入春燠聞鳥哢斲藥
時荷鉏灌圃晨抱甕薇生富採擷橘熟斷包貢喬松已
巢鶴瘦竹待鳴鳳回首視世人真若塏一閤

尋幽宿隱者居

先生巢許流遠志在箕穎由來天機深遂使塵事屏雲
靈山徑長草沒柴門靜相逢冬日暮共語寒夜永照暝
然枯松漱泉澗暗井虎嘯谷風生猿啼霜月冷潺湲瀑
泉聲寒亂高杉影藐焉豁塵襟頗若異人境明朝還別
君尋幽過他嶺他日擬重來同采春山茗

齒脫

老齒皆脫落十中無二三存者一動搖咀嚼寧復堪茶

薺均一咽盡畧苦與甘世味非道腴正爾不欲耽

老景

日月如飛梭為我織老景蒼艾浸成色素絲颯垂領短
長任所裁厚薄焉足省善賈亦徒施終然付泡影

天目山僧隱居

卜居就窮崖几席淨如汜三池更幽絕澄澈皆可鑑深
處有蟠蛟遊子不敢瞰獨向月明時臨流學清梵

滅迹

滅迹巖岫間居然養真素夕餐籬菊英朝飲木蘭露玄
衢諒堪涉時榮焉足慕萬古功名人累累但丘墓

衰病

衰病苦無悰偃仰以終日少間步東園愈使我心休名
芳掃跡空野草爭頭出無力事耘耔長吁返蓬室

桂感

桂非桃李儔露冷花始拆馨香枝可取欲以寄嘉客道
遠莫能致徘徊終日夕別情因物感千里未嘗隔

四皓

皓首四老人獨見何明徹耻為暴秦汙商山永歸潔暫
出正前星遄回卧松雪終令漢天子不敢亂適孽舒卷
盡天機非徒上名節

石室

石室靜而深青山迭相映且無籠檻羈頗適猿鳥性外
物俱棄捐內塵亦清淨人莫來扣門驚回老僧定

深居

深居在空閑頗適靜者性門外無遊塵落葉滿荒徑陽
光下西垂東嶺有餘映焚香讀楞伽唯許山鬼聽

榮華不入夢於焉謝憂責深居三十年禽猿盡相識白
日久知心孤雲本無迹丈室常寂然焚香自終夕

哭立虛舟

虛舟我良友生平快冥搜放迹江湖間自與造物遊憶
昔仗短筇訪我竺峯頭貽我選體詩得法於曹劉因之
興定盟有若膠漆投出處雖小殊夢寐常相求是乃以

神交真如持遠傳有力負舟去迅速不少留易寘於涼
池亦善為舟謀我獨念故情涕淚如泉流些舟以此詩
舟亦能聽不舟或不吾聽吾淚終難收

今日

今日天氣佳悠然動清興桑間葢初熟時復鳴戴勝同
遊盡蕭散野徑亦幽夔仰面看青天長嘯山谷應

閒靜詞

自從住山來未嘗離於山予愛山之靜山亦多予閒閒

靜兩相得悠然真意存白雲乃知此難與躁者言

裛集詩藁

吾學本經論由之契無為書生習未忘有時或吟詩興
到即有言長短信所施盡忘工與拙往往不修辭唯覺
意頗真亦復無邪思事物皆寓爾又豈存肝脾老來欲
消閒裛集還自嗤聊以識吾過吾道不在茲